



U Sarajevu u akcijama "Twins" i "Pismo" uhapšeno devet lica

SIROMAŠNE DJEVOJKE TJERALI NA PROSTITUCIJU

Koristili su se već poznatim šablonom - na internetu su objavljivali oglase i tako dolazili do žrtava

Dragan SLADOJEVIĆ

SARAJEVO - Ukupno devet lica uhapšeno je u petak na području Sarajeva, a na teret im je stavljeno da su veći broj djevojaka iz BiH, Srbije, pa čak i Ukrajine, "gurnuli" u pakao prostitucije.

One su seksualne usluge pružale u BiH, Austriji i Njemačkoj, a preko njih su krijumčari iz BiH, sa saradnicima iz Srbije, ugrabili vrtoglave cifre, koje se mjere stotinama hiljada evra.

Razbijanje ove grupe rezultat je dviju povezanih, međunarodnih policijskih akcija "Twins" i "Pismo", usmjerenih protiv grupe krijumčara ljudi.

Koristili su se već poznatim

šablonom, a sistem vrbovanja je bio dosta razraden. Na meti su im bile uglavnom siromašnije djevojke.

"Na određenim internet stranicama objavljivali su oglase i tako dolazili do žrtava", pojašnjava izvor "Nezavisnih".



"Nezavisnim" je potvrđeno da su djevojke koje su pokušale izaći iz ovog lanca bile izložene raznim vrstama hladnokrvne torture, od prijetnji do psihičkog

pa čak i fizičkog zlostavljanja.

Akcije su sproveli pripadnici Državne agencije za istrage i zaštitu (SIPA), po naredbama Suda BiH i Tužilaštva BiH.

Na području Sarajeva u akciji "Twins", sprovedenoj uz podršku policajaca MUP-a Kantona Sarajevo, u potrazi za dokazima "prečešljani" su objekti na više lokacija, a palo je osam krijumčara, kojima se na teret stavljaju međunarodna trgovina ljudima i navođenje na prostituciju, te pranje novca.

Iz SIPA je potvrđeno da su ovi krijumčari djelovali duže vrijeme, te da su koristili težak socijalni položaj nesrećnih djevojaka, koje su slali čak i u Njemačku i Austriju da se bave prostitucijom.

Pretrasi i hapšenja izvedeni su i u Srbiji, gdje je uhapšeno troje, ali i u Austriji i Njemačkoj.

Kada je riječ o akciji "Pismo", u sklopu nje su pripadnici SIPA na jednoj lokaciji na

području Vogošće u potrazi za dokazima pretresli jedan objekt i uhapsili jedno lice, takode zbog krijumčarenja ljudi i međunarodnog navođenja na prostituciju.

"Prikupljeni su dokazi da je grupa osumnjičenih iz BiH i Srbije iskorištavala težak položaj žrtava iz BiH, Srbije i Ukrajine, uglavnom mladih djevojaka, koje su iskorištavali za pružanje seksualnih usluga na području BiH, Austrije i Njemačke", saopšteno je iz Tužilaštva BiH.

**SISTEM
VRBOVANJA
BIO
RAZRADEN
DJEVOJKE KOJE SU
POKUŠALE
DA SE SPASU IZ
LANCA BILE ŽRTVE
HLADNOKRVNE
TORTURE**

